

Wolle merr widder oofonge ze raache?

Omm Somsdaach habb ichs Kättche getroffe, mir hawwe geschwätzt unn sinn vom Hinkelsche uffs Gickelsche kumme. Uff oomal sätse: Dess wollt ich dir joo noch verzähle: Hott mich doch vor e paar Daach moi ahl Schulfreundin, die Theresa, oogerufe ...

Ich habbse unnerbroche unn schnell gefroocht: Ei was mächtse donn, die Theresa? Josses naa, die habb ich joo schunn ewisch nimmi geseh. Lebt die noch in Hannover?

Ja, gibt's Kättche ze Ontwort, aach ich habbse schunn long nimmi geseh. Sunnst isse ab unn zu mol nooch Flerschem kumme, omm Verlobde Daach odder onn Fassenacht, awwer die unn ihrn Monn giehn nimmi vor Hinkels Loch, die giehn grad noch oikaafe.

Die Theresa, saach ich, ach, was war dess ferr e schee Mädche! Was war ich su stolz, wie ich mett dere mol im Gloria-Kino gesotze unn Händche gehalle habb. Unn donn hottse uff de Hochzeit von ihrne Schwester den Kerl aus Hannover kennegelernt unn fort warse. Wie geht's err donn, der Theresa?

No ja, hotts Kättche gesaat, der giehts noch gut, awwer mett ihrn Monn hottse ihr Last. Mir hottse verzählt, der det jetz widder oofonge ze raache. Dreißisch Johr hädde nimmi geraacht unn jetz deter widder oofonge. Weil doo hädde so e paar Schlaue erauskriecht, dass dess Nikotin in dene Zigarette gut wär geesche die Vergesslichkeit.

Ich saach: Ah ja, dess habb ich aach gelese.

Ja, säts Kättche, dabei det dere ihrn Monn sowieso alles vergesse wasse dem grad gesaat hätt.

Ich habb gegrinst: Dass dess Nikotin awwer gut iss ferr die Vergesslichkeit, dess behällder, also iss doch noch e bissi was doo in dem soim Herrn. Wenn die noch so vill babbelt wie frieher, der hott joos Maul nitt stillgestonne, kann ich merr vorstelle, dass der Monn nor so dut, als deder alles vergesse, ess gibt so Männer. Doodebei hotter nor nitt zugeheert, wenn die Theresa was gesaat hott.

Saach emol, Honnes, moonts Kättche, awwer dess iss doch werklisch nitt gut mett dene Zigarette, weeschem Lungekrebs. Wivill junge Leit sinn doodroo schunn gestorwe.

Ich habb gesaat: Wie alt isser donn, de Theresa ihrn Monn?

Ei so alt wie du, säts Kättche, sechsunnisibbsisch.

Ich habb widder gegrinst. Siehsde Kättche, wanner jetz oofängt ze raache unn wanner doodemett die Vergesslichkeit e paar Johr enausschiewe dut, weiler joo iwwer dess Alter, wo err jung sterwe det, driwwer weck iss, dann det sichs Raache schunn rendiern. Aach ferr mich det sichs rendiern unn aach ferr de Schorsch, ich werr emol mettem redde, ob merr nitt widder oofonge solle ze raache.

Dess Kättche hott mich oogegauzt: Waach dich, Honnes. Donn kündisch ich dir die Freundschaft, den Gestonk im ganze Haus will ich nimmi hawwe. Doi Fraa wollt den Qualm aach nitt.

Guck emol, Kättche, saach ich, ihr Fraue misst eich entscheide. Wollder Raach im Haus unn doodeferr enn Monn, der noch mettredde kann, odder hädde lieber ooner, der noch nitt emol mehr waaß, ob Mittwoch odder Sunndaach iss?

Doo säts Kättche. Ich will koon Gestonk mehr im Haus. Unn ob Mittwoch odder Sunndaach iss, dess saach ich emm dann schunn, moim Schorsch.

Eiern Honnes